

Monsieur

Le sujet de la presente vous sera representé par
celuy mesme qui me le fait naistre, c'est le Sr
van Els Lieutenant de la compagnie vacante
de feu M.^r le Cap^{ne} d'Ouden: Il va solliciter
enuers Son Altesse pour la charge de son Cap^{ne}
defunct, Et sachant que pour faciliter l'obtention
de sa tres humble recherche il n'y scauroit employer
vn mouuement plus puissant que celui de vostre
favorable recommandation, m'a prié instamment
de le vouloir accompagner de ces lignes, qui luy
puissent en partie seruir en vostre endroit de
tesmoignage combien ie serois content s'il
paruenoit à l'effect de cette sienne tant legitime
pretension. C'est pourquoy, Monsieur, i'ose prendre
la liberté de vous supplier de l'honorer et
obliger tous ensemble de vostre bienueillance, sur
tout en vne occasion où il y va si souverainement
du bien de ses interets. C'est vn Gentilhomme
qui tasche de se rendre par son bon naturel
recommandable enuers tous les honnestes gens,
outre que les différentes occasions esquelles il s'est
desia fait remarquer d'estre homme de coeur
parlent pour luy, assauoir qu'il est capable
de remplacer cette charge de Cap^{ne} au contentement
de Sad.^{te} Alt.^e et au bien du seruice de l'Etat.
Je participeray donc fort à la faueur qu'il vous
plaira luy faire sentir en cette rencontre, et

demeureray non seulement pour cette, mais pour toutes les precedentes,
tresmeritalement

Monsieur

Vostre tres humble & oblige seruiteur

Le 23^{me} fev^r 1646. 4.

J. H. M. van Els

